



Siverth K. Heilmann

UPA 2023/168

Atassut

26. april 2023

Qanoq iliornikkut eqqumiitsuliortut amerlanerit namminersortuunerulersissinnaavagut pisortaniillu tapiissutinik qinnuteqartuartarneq isumalluutaavallaarunnaartissinnaanera pillugu apeqquteqaat aallaavigalugu oqallisissiasatut siunnersuut.

(Inatsisartuni ilaasortaq Aqqalu C. Jerimiassen, Atassut)

Atassummiit siunnersuuteqartoq Aqqalu C. Jerimiassen qutsavigerusuppara oqallissaarutaanut. Imatullu naatsumik oqaaseqarfigissavara.

Ukiuni kingullerni malunnarpoq Atassummi inuusuttortagut eqqumiitsuliornikkut atukkat pitsangorsarusullugit suliaqartualersimasut. Tamannalu nuannaarutissaraarput. Maluginiarnarporlu inuusuttut akornanni eqqumiitsuliornikkut pikkorilluinnartut, sunngiffimmi suliaasaannartut isigiunnaarlugu inuussutissarsiutissaqqissutut aallutilersimagaat.

Atassummiit imminut napatissinnaanissamik, namminersortuunissamullu tapersersuiuartuusugut tamakkiiisumik siunnersuut taperserlugu ilaliinnassavara, siunnersuuteqartullu tunngavilersuutimini pingaartillugu eqqaasaa, tassa aningaasaliissutaannarnik, tapertittarnermillu taamaallaat isumalluuteqarnani suliaq ingerlanneqalillaqullugu suaaruteqartoq.

Tapiissutit pisariaqarluinnarput, sulianullu annertuunut tapertaalluartussaallutik. Taamaattorli inuussutissarsiuteqartutut kimulluunniit taakku isumalluutaajuartussaangillat. Akileraartarnikkullu nutserisut eqqumiitsuliornikkullu immikkut nalunaarummi pineqarnerisa allanngortinnissaa Atassummiit oqariartuutigerusupparput.

Eqqaarusupparputtaaq inoqarfiusuni mikinerusuni assersuutigalugu nipilersorneq aallunneqartuarmat, nipilersorfiusartut mikinerit inukitsunnguusarmata akilersinnaanerusumillu pisoqartitsinerulissappata akileraartarnikkut aaqqiiffigisariaqarigut Atassummiit oqariartuutigerusupparput. Taakkunani aningaasat kaaviiartut annertunngimmata akileraartarnikkut malersugarisariaqannginnatsigit.

Taamatut naatsumik oqaaseqarlunga alloriaatissanik siunnersuutaasut ammaffigalugit qujavunga.